

## **Wočakowanja Domowiny na kandidatow wólbow krajneju radow a wokrjesneju sejmikow noweju wulkowokrjesow Budyšin a Zhorjelc**

Domowina – Zwjazk Łužiskich Serbow z.t. jako zastupjerka zajimow serbskeho ludu wočakuje hladajo na spadowacy podžěl serbskeje ludnosće we woběmaj wulkowokrjesomaj, zo so spěchowanje serbskeje rěče a kultury zesylni. Serbska komponenta wobeju wokrjesow měła so jako wobohaćenje a swojoraznosť bóle hač dotal wobkedźbować a spěchować. Kandidatam za wokrjesne wólby měli so naše wočakowanja přepodać, zo bychu w přihotach na wólby swoje stejišćo k tomu wotekali:

1. Nanajspěšnišo měli so zdžělać a schwalić **nowe wustawki** wobeju wokrjesow ke škitej a spěchowanju serbskeje rěče a kultury po wothłosowanju z Domowinu. K tomu předpołoża župy naćisk wustawkow, kiž měł zakład za wobjednanje we wokrjesnymaj sejmikomaj być,
2. Wažny wobstatk nowych wustawkow měło być wutworjenje **přirady za serbske naležnosće**, kiž zapřija angažowanych, čestnohamtsce skutkowacych Serbow a dóstanje słyšenske, namjetowanske a rěčenske prawo.
3. Zarjadować měło so poboku krajneho rady **městno zamołwiteho za serbske naležnosće**, kiž by dyrbjał so hłownohamtsce jeničce tutym prašenjam wěnować.
4. **Niwow a wuměnjnja za přiswojenje serbskeje rěče** po modelomaj WITAJ a 2plus a pěstowanje serbskeje kultury w kubłanišćach měłoj so dale polěpšić. W tutym zwisku měli so dotalne rozsudy k syći serbskich šulow resp. šulow ze serbskim poskitkom znowa přepruwować. To potrjechi wosebje šule na kraju, kiž tworja tam trěbne rěčne rupy a su z kulturnym srjedzišćom.  
Wobaj wokrjesaj měłoj dalše wutworjenje WITAJ-pěstowarnjow a –skupinow aktiwnje podpěrować.
5. Wokrjesnej sejmkej w Budyšinje a Zhorjelcu měli bój Serbow wo **zachowanje serbskich institucijow a wo dosahace financowanje Załožby za serbski lud** bóle hač dotal na politiskej runinje podpěrać. Zawrjenju dalšich serbskich institucijow a dalšim redukowanjam jich skutkowanja falowacych pjenjow dla měło so zadžěwać.
6. W zarjadnistwje noweju wokrjesow měli so **dwurěčne napisma a móžnosće wužiwanja serbskeje rěče** napřećo zarjadnikam zaručić.  
W publikacijach a hamtskich wozjewjenjach měli so serbska rěč a serbske naležnosće wobkedźbować.
7. **Při wupisanju městnow** wokrjesneho zarjadnistwa měło so **wobknježenje serbskeje rěče jako kwalifikaciske znamjo** wupokazać, kiž pola samsneje kmanosće za přistajenje runje tutoho požadarja rěči.
8. Wočakuje so, zo **nowej wokrjesaj** při zachowanju a spěchowanju serbskeje rěče a kultury **kooperěrujetej** a wotpowědne dojednanja wotzamknjetej.

**9. Serbski sydlenski teritorij wokrjesa Zhorjelc** trjeba w powjetšnym administratiwnym wobłuku wosebje tež hladajo na sčěhi dołhodobneho wudobywanja brunicy wosebitu podpěru a narunanje škodow.

**10.** Ze stron wokrjesneju sejmikow měłoj so **toleranca a zhromadnosć** mjez Serbami a Němcami spěchować a pohonjować.